

摩訶般若波羅蜜經卷第十二

姚秦三藏法師鳩摩羅什共僧叡譯

十善品第三十八之餘

摩訶般若波羅蜜經卷十二

十善品第三十八之餘

摩訶般若波羅蜜經卷十二

十善品第三十八之餘

佛言有善男子善女人說有所得般若波羅蜜是為相似般若波羅蜜釋提桓因白佛言世尊云何善男子善女人說有所得般若波羅蜜是為相似般若波羅蜜佛言善男子善女人說有所得般若波羅蜜是為相似般若波羅蜜者說色無常作是言能如是行是行般若波羅蜜行者求色無常是為行相似般若波羅蜜說受想行識無常作是言能如是行是行般若波羅蜜行者求受想行識無常是

為行相似般若波羅蜜說眼無常乃至說意無常說色無常乃至說法無常說眼界無常色界眼識界無常乃至說眼界法界意識界無常說地種無常乃至說識種無常說眼識界無常乃至說意識界無常說眼觸無常乃至說意觸無常說眼觸因緣生受無常及至說意觸因緣生受無常廣說如五陰說色苦乃至說意觸因緣生受苦說色無我乃至說意觸因緣生受無我皆如五陰說行者行檀波羅蜜時為說色無常苦無我乃至意觸因緣生受說無常苦無我尸羅波羅蜜乃至般若波羅蜜亦如是行四禪四無量心四無色定為說無常苦無我行四念處為說無常苦無我乃至行薩婆若時為說無常苦無我作如是教能

如是行者是為行般若波羅蜜憍尸迦是名相似般若波羅蜜復次憍尸迦若是善男子善女人當來世說相似般若波羅蜜作是言汝善男子善女人修行般若波羅蜜汝修行般若波羅蜜時當得初地乃至當得十地禪波羅蜜乃至檀波羅蜜亦是行者以相似有所得以總相修是般若波羅蜜憍尸迦是名相似般若波羅蜜復次憍尸迦善男子善女人欲說般若波羅蜜作是言汝善男子善女人修行般若波羅蜜已當過聲聞辟支佛地是名相似般若波羅蜜復次憍尸迦善男子善女人為求佛道者如是說汝善男子善女人修行般若波羅蜜已入菩薩位得無生法忍得無生忍已便住菩薩神通從一佛國至一佛國

供養諸佛恭敬尊重讚歎如是說者是名相似般若波羅蜜復次憍尸迦善男子善女人為求佛道者如是說汝善男子善女人學是般若波羅蜜受持讀誦說正憶念當得無量無邊阿僧祇功德如是說者是名相似般若波羅蜜復次善男子善女人為求佛道者如是說如過去未來現在諸佛功德善本從初發心至成得佛都合集回向阿耨多羅三藐三菩提如是說者是名相似般若波羅蜜釋提桓因白佛言世尊云何善男子善女人為求佛道者不說相似般若波羅蜜佛言若善男子善女人為求佛道者般若波羅蜜善男子汝修行般若波羅蜜莫觀色無常何以故色色性空是色性非法若非法即名為般若波羅蜜般

若波羅蜜中色非常非無常何以故是中色尚不可得何況常無常憍尸迦善男子善女人如是說者是名不說相似般若波羅蜜受想行識亦如是復次憍尸迦善男子善女人為求佛道者說汝善男子修行般若波羅蜜於諸法莫有所過莫有所住何以故般若波羅蜜中無有法可過可住所以者何一切法自性空自性空是非法若非法即是般若波羅蜜般若波羅蜜中無有法可入可出可生可滅憍尸迦是善男子善女人如是說是名不說相似般若波羅蜜廣說如上與相似相違是名不說相似般若波羅蜜如是憍尸迦善男子善女人應如是演說般若波羅蜜義若如是說般若波羅蜜義所得功德勝於前者復次憍

尸迦閻浮提中所有眾生皆教令得須陀洹於汝意云何是人得福多不答言甚多世尊佛言不如是善男子善女人以般若波羅蜜為他人種種因緣演說其義開示分別令易解如是言善男子善女人汝來受是般若波羅蜜勤讀誦說正憶念如般若波羅蜜中所說行何以故是般若波羅蜜中出生諸須陀洹憍尸迦置閻浮提中眾生復置四天下眾生小千國土二千中國土三千大千國土眾生若有人教十方如恆河沙等國土中眾生盡教令得須陀洹於汝意云何是人得福多不答言甚多世尊佛言不如是善男子善女人以般若波羅蜜為他人種種因緣演說其義開示分別令易解如是言善男子善女人汝來受是

般若波羅蜜勤讀誦說正憶念如般若波羅蜜中所說行何以故是般若波羅蜜中出生諸須陀洹復次憍尸迦若有善男子善女人教閻浮提中人令得斯陀含阿那含阿羅漢於汝意云何是人得福多不答言甚多世尊佛言不如是善男子善女人以般若波羅蜜為他人種種因緣演說其義開示分別令易解如是言善男子汝來受是般若波羅蜜勤讀誦說正憶念如般若波羅蜜中所說行何以故般若波羅蜜中出生諸斯陀含阿那含阿羅漢故乃至十方如恆河沙等國土中眾生亦如是復次憍尸迦若善男子善女人教一閻浮提中眾生令得辟支佛道於汝意云何是人得福多不答言甚多世尊佛言不如是善男子

善女人以般若波羅蜜為他人種種因緣演說其義開示分別令易解如是言汝來善男子受是般若波羅蜜勤讀誦說正憶念如般若波羅蜜中所說行何以故般若波羅蜜中出生諸辟支佛道故四天下乃至十方如恆河沙等國土中眾生亦如是復次憍尸迦善男子善女人教一閻浮提中眾生令發阿耨多羅三藐三菩提心於汝意云何是人得福多不答言甚多世尊佛言不如是善男子善女人以般若波羅蜜為他人種種因緣演說其義開示分別令易解亦如是言汝當隨般若波羅蜜中學當得一切智法汝若得一切智法汝便得修行般若波羅蜜增益具足若得修行般若波羅蜜增益具足汝當得阿耨多羅三藐

三菩提何以故憍尸迦般若波羅蜜中生諸初發意菩薩摩訶薩故乃至十方如恆河沙等國土亦如是復次憍尸迦善男子善女人教一閻浮提中眾生令住阿惟越致地於汝意云何是人福德多不答言甚多世尊佛言不如是善男子善女人以般若波羅蜜為他人種種因緣演說其義開示分別令易解如是言汝來善男子受是般若波羅蜜乃至如般若波羅蜜中所說行汝便得一切智法得一切智法已乃至便得阿耨多羅三藐三菩提何以故般若波羅蜜中生諸菩薩摩訶薩阿惟越致地故乃至十方如恆河沙等國土亦如是復次憍尸迦一閻浮提中眾生發意求阿耨多羅三藐三菩提若有善男子善女人為是人

廣說般若波羅蜜及其義解開示分別如是言汝來善男子受是般若波羅蜜乃至如般若波羅蜜中所說行學已汝當得阿耨多羅三藐三菩提復有人為一阿惟越致菩薩演說般若波羅蜜及其義解開示分別汝來受是般若波羅蜜乃至如般若波羅蜜中所說行學已汝當得阿耨多羅三藐三菩提是善男子所得功德甚多乃至十方如恆河沙等國土中亦如是復次憍尸迦若有一閻浮提中眾生皆得阿惟越致阿耨多羅三藐三菩提復有善男子善女人以般若波羅蜜為是人演說其義於是中有一菩薩疾欲得阿耨多羅三藐三菩提若有善男子善女為此菩薩說般若波羅蜜及其義解是人功德最多乃至十

方如恆河沙等國土亦如是釋提桓因白佛言世尊如菩薩摩訶薩轉轉近阿耨多羅三藐三菩提者如是應轉轉教行檀波羅蜜尸羅波羅蜜羼提波羅蜜毗梨耶波羅蜜禪波羅蜜般若波羅蜜應教內空乃至無法有法空四念處乃至八聖道分佛十力四無所畏四無礙智十八不共法亦應供養衣服臥具令食湯藥隨其所須是善男子善女人法施財施供養是菩薩所得功德勝於前者何以故世尊是菩薩摩訶薩疾得阿耨多羅三藐三菩提故爾時慧命須菩提語釋提桓因言善哉善哉憍尸迦汝為聖弟子安慰諸菩薩摩訶薩為阿耨多羅三藐三菩提者以法施財施利益法應爾何以故菩薩中生諸佛聖眾若菩薩

不發阿耨多羅三藐三菩提心者是菩薩不能學六波羅蜜乃至十八不共法若不學六波羅蜜乃至十八不共法不能得阿耨多羅三藐三菩提若不能得阿耨多羅三藐三菩提者則無聲聞辟支佛以是故憍尸迦諸菩薩摩訶薩學六波羅蜜乃至十八不共法學六波羅蜜乃至十八不共法時得阿耨多羅三藐三菩提得阿耨多羅三藐三菩提故斷地獄畜生餓鬼道世間便有刹利大姓婆羅門大姓居士大家四天王天乃至非有想非無想天乃至檀波羅蜜尸羅波羅蜜羼提波羅蜜毗梨耶波羅蜜禪波羅蜜般若波羅蜜內空乃至無法有法空四念處乃至十八不共法出現於世聲聞乘辟支佛乘佛乘皆現於世

隨喜品第三十九

爾時彌勒菩薩摩訶薩語慧命須菩提有菩薩摩訶薩隨喜福德與一切眾生共之回向阿耨多羅三藐三菩提以無所得故若聲聞辟支佛福德若一切眾生福德若布施若持戒若修定若隨喜是菩薩摩訶薩隨喜福德與一切眾生共之回向阿耨多羅三藐三菩提其福最上第一最妙無上無與等何以故聲聞辟支佛及一切眾生布施持戒修定隨喜為自調為自淨為自度故起所謂四念處乃至八聖道分空無相無作菩薩隨喜福德回向阿耨多羅三藐三菩提持是功德為調一切眾生為淨一切眾生為度一切眾生故起爾時慧命須菩提白彌勒菩薩言諸菩

473

薩摩訶薩念十方無量無邊阿僧祇國土中無量無邊阿僧祇諸滅度佛從初發心乃至得阿耨多羅三藐三菩提入無餘涅槃乃至法盡於其中間諸善根應六波羅蜜及諸聲聞人善根若布施福德持戒修定福德及諸學人無漏善根無學人無漏善根諸佛戒眾定眾慧眾解脫眾解脫知見眾一切智大慈大悲及餘無量阿僧祇諸佛法及諸佛所說法是法中學得須陀洹果乃至得阿羅漢果辟支佛道入菩薩摩訶薩位及餘眾生種諸善根是諸善根一切和合隨喜福德回向阿耨多羅三藐三菩提最上第一最妙無上無與等如是隨喜已持是隨喜福德回向阿耨多羅三藐三菩提若有善男子行菩薩乘者作是念我

474

是心回向阿耨多羅三藐三菩提是生心緣事若善男子
取相回向阿耨多羅三藐三菩提如所念可得不彌勒菩
薩語須菩提是善男子行菩薩乘回向阿耨多羅三藐三
菩提心是緣事若善男子取相不得如所念須菩提語彌
勒菩薩若諸緣諸事無所有是善男子行菩薩乘者取相
於十方諸佛諸善根從初發心乃至法盡及聲聞諸善根
學無學善根一切和合隨喜功德回向阿耨多羅三藐三
菩提以無相故是菩薩將無顛倒無常謂常想顛倒心顛
倒見顛倒不淨謂淨苦謂為樂無我謂我想顛倒心顛倒
見顛倒苦如緣如事為阿耨多羅三藐三菩提亦是回
向心亦是檀那波羅蜜尸羅波羅蜜羼提毗梨耶禪那

般若波羅蜜乃至十八不共法亦是若爾者何等是緣
何等是事何等是阿耨多羅三藐三菩提何等是善根何
等是隨喜心迴向阿耨多羅三藐三菩提彌勒菩薩語須
菩提若諸菩薩摩訶薩久行六波羅蜜多供養諸佛種善
根與善知識相隨善學自相空法是諸菩薩是緣是事諸
佛諸善根隨喜福德不取相回向阿耨多羅三藐三菩提
以不二法非不二法非相非不相非可得法非不可得法
非淨非垢不生不滅法是名回向阿耨多羅三藐三菩提
若諸菩薩不久行六波羅蜜不多供養諸佛不種善根不
與善知識相隨不善學自相空法是諸菩薩是諸緣是諸
事諸佛諸善根隨喜福德諸心取相回向阿耨多羅三藐

三菩提是不名回向須菩提如是般若波羅蜜義乃至一切種智義所謂內空乃至無法有法空不應為新學菩薩說何以故是菩薩所有少許信樂恭敬清淨心皆忘失當在阿毗跋致菩薩摩訶薩前說若有為善知識所護若久供養諸佛種諸善根應為是人說如是般若波羅蜜義乃至一切種智義所謂內空乃至無法有法空是人聞是法不沒不驚不畏不怖須菩提菩薩摩訶薩隨喜福德應如是回向阿耨多羅三藐三菩提所謂菩薩用心隨喜福德回向阿耨多羅三藐三菩提是心盡滅變離是緣是事是諸善根亦盡滅變離是中何等是隨喜心何等是諸緣何等是諸事何等是諸善根隨喜回向阿耨多羅三藐三菩

提二心不俱是心性亦不可得回向菩薩云何隨喜心回向阿耨多羅三藐三菩提若菩薩摩訶薩行般若波羅蜜時如是知是般若波羅蜜無有法乃至檀波羅蜜亦無有法色無有法受想行識乃至阿耨多羅三藐三菩提無有法菩薩摩訶薩應如是隨喜功德回向阿耨多羅三藐三菩提若能如是回向是名隨喜功德回向阿耨多羅三藐三菩提爾時釋提桓因語須菩提言新發意菩薩聞是事將無驚懼怖畏須菩提云何新發意菩薩作諸善根回向阿耨多羅三藐三菩提復云何隨喜福德回向阿耨多羅三藐三菩提須菩提語釋提桓因若新發意菩薩行般若波羅蜜不受是般若波羅蜜以無所得故無相故乃至檀

那波羅蜜亦如是多信解內空乃至多信解無法有法空
多信解四念處乃至十八不共法常與善知識相隨是善
知識為說六波羅蜜義開示分別如是教授令常不離般
若波羅蜜乃至得入菩薩法位終不離般若波羅蜜乃至
不離檀那波羅蜜不離四念處乃至十八不共法亦教語
魔事聞種種魔事已不增不減何以故是菩薩摩訶薩不
受一切法故是菩薩亦常不離諸佛乃至得菩薩位於中
種善根以是善根故生菩薩家乃至得阿耨多羅三藐三
菩提終不離是善根復次新發意菩薩摩訶薩於過去十
方無量無邊阿僧祇國土中諸佛斷生死道斷諸戲論道
盡棄重擔滅聚落刺斷諸有結正智得解脫及弟子所作

功德於是中若刹利大姓婆羅門大姓居士大家四天王
天乃至淨居天所種善根是一切和合稱量以隨喜心最
上第一最妙無上無與等應隨喜隨喜已回向阿耨多羅
三藐三菩提爾時彌勒菩薩語須菩提若新發意菩薩摩
訶薩念諸佛及弟子諸善根隨喜功德最上第一最妙無
上無與等隨喜已應回向阿耨多羅三藐三菩提云何菩
薩不墮想顛倒心顛倒見顛倒須菩提言若菩薩摩訶薩
念諸佛及僧於是中不生佛相不生僧相無善根相用是
心回向阿耨多羅三藐三菩提是心中亦不生心相菩薩
如是回向想不顛倒心不顛倒見不顛倒若菩薩摩訶薩
念諸佛及僧善根取相取相已回向阿耨多羅三藐三菩

提菩薩如是名為想顛倒心顛倒見顛倒若菩薩摩訶薩
用是心念諸佛及僧諸善根是心念時即知盡滅若盡滅
是法不可得回向所用回向心亦是盡滅相所回向處是
法亦如是相若如是相回向是名正回向非邪回向菩薩
摩訶薩應如是回向阿耨多羅三藐三菩提復次若菩薩
摩訶薩過去諸佛善根及弟子善根是中凡夫人聞法種
善根若諸天龍夜叉乾闥婆阿修羅迦樓羅摩睺羅伽聞
法種善根若刹利大姓波羅門大姓居士大家四天王天
乃至阿迦尼吒天聞法種善根發阿耨多羅三藐三菩提
心是一切福德和合稱量隨喜功德最上第一最妙無上
無與等回向阿耨多羅三藐三菩提是時菩薩若如是知

是諸法盡滅所回向處及法亦自性空能如是回向是名
真回向阿耨多羅三藐三菩提復次若菩薩如是知無有
法能回向法何以故一切法自性空故若如是回向是名
正回向阿耨多羅三藐三菩提如是菩薩摩訶薩行般若
波羅蜜乃至檀那波羅蜜不墮想顛倒心顛倒見顛倒何
以故菩薩不著是回向亦不見以諸善根回向菩提心處
是名菩薩摩訶薩無上回向復次若菩薩摩訶薩知所起
福德離五陰十二入十八界亦知般若波羅蜜是離相乃
至檀那波羅蜜是離相內空乃至無法有法空是離相四
念處乃至十八不共法是離相如是菩薩摩訶薩隨喜心
起福德名回向阿耨多羅三藐三菩提復次若菩薩摩訶

薩隨喜福德知隨喜福德自性離亦知諸佛離佛性諸善
根亦離善根性菩提心菩提心性亦離回向回向性亦離
菩薩菩薩性亦離般若波羅蜜般若波羅蜜性亦離禪那
波羅蜜毗梨耶波羅蜜羣提波羅蜜尸羅波羅蜜檀那波
羅蜜檀那波羅蜜性亦離乃至十八不共法十八不共法
性亦離菩薩摩訶薩應如是行離相般若波羅蜜是名菩
薩摩訶薩般若波羅蜜中生隨喜福德復次菩薩摩訶薩
過去滅度諸佛諸善根若欲回向應如是回向作是念如
諸佛滅度相諸善根相亦如是滅度法相亦如是我用心
回向是心相亦如是若能如是回向當知是回向阿耨多
羅三藐三菩提如是回向不墮想顛倒心顛倒見顛倒若

菩薩摩訶薩行般若波羅蜜時取諸佛善根相回向阿耨
多羅三藐三菩提是不名為回向何以故諸佛去佛及善
根非相緣非無相緣若菩薩摩訶薩作如是取相是不名
善根回向阿耨多羅三藐三菩提如是菩薩摩訶薩墮想
顛倒心顛倒見顛倒若菩薩摩訶薩諸佛及諸善根及諸
心不取相是名以諸善根回向阿耨多羅三藐三菩提如
是菩薩摩訶薩不墮想顛倒心顛倒見顛倒爾時彌勒菩
薩問須菩提云何菩薩摩訶薩於諸善根不取相能回向
阿耨多羅三藐三菩提須菩提言以是事故當知菩薩摩
訶薩所學般若波羅蜜中應有般若波羅蜜方便力若是
福德離般若波羅蜜不得回向阿耨多羅三藐三菩提何

以故般若波羅蜜中諸佛不可得諸善根不可得回向阿
耨多羅三藐三菩提心亦不可得於是中菩薩摩訶薩行
般若波羅蜜時應如是思惟過去諸佛及弟子身皆滅諸
善根亦滅我今取相分別諸佛諸善根及諸心以是取相
回向阿耨多羅三藐三菩提諸佛所不許何以故取相有
所得故所謂於過去諸佛取相分別是故菩薩摩訶薩欲
以諸善根回向阿耨多羅三藐三菩提不應有得不應取
相如是回向若有得取相回向諸佛不說有大利益何以
故是回向裸毒故譬如美食裸毒雖有好色好香為人所
貪而其中裸毒愚癡之人食之歡喜貪其好色香美可口
飯欲消時受若死若死等苦若善男子善女人不諦受不

諦取相不諦讀誦不解中義如是教他言汝善男子過去
未來現在十方諸佛從初發意已來至得阿耨多羅三藐
三菩提入無餘涅槃乃至法盡於其中間行般若波羅蜜
時作諸善根行禪那波羅蜜毗梨耶波羅蜜羼提波羅蜜
尸羅波羅蜜檀那波羅蜜時作諸善根修四禪四無量心
四無色定四念處乃至八聖道分佛十力乃至修十八不
共法時作諸善根淨佛國土成就眾生作諸善根及諸佛
戒眾定眾慧眾解脫眾解脫知見眾一切種智無錯謬法
常捨行及諸弟子是中所種善根及諸佛所記當作辟支
佛是中諸天龍阿修羅迦樓羅緊那羅摩睺羅伽等所種
善根是諸福德稱量和合隨喜回向阿耨多羅三藐三菩

提是回向以取相得法故如裸毒食得法者終無正回向
何以故是得法裸毒有相有動有戲論若如是回向則為
謗佛不隨佛教不隨法說是善男子善女人求佛道應如
是學過去未來現在諸佛從初發意乃至法盡及弟子行
般若波羅蜜時作善根乃至修一切種智如上說云何諸
善根回向阿耨多羅三藐三菩提正回向有求佛道善男
子善女人行般若波羅蜜不欲謗諸佛者修諸福德應如
是回向如諸佛所知以無上智慧是諸善根相是諸善根
性我亦如是隨喜如諸佛所知我亦如是回向阿耨多羅
三藐三菩提求菩薩道善男子善女人應如是回向阿耨
多羅三藐三菩提若如是回向則為不謗佛如佛所教如

佛法說是菩薩摩訶薩回向則無裸毒復次求佛道善男
子善女人行般若波羅蜜時諸善根應如是回向如色不
繫欲界不繫色界不繫無色不繫法者不名過去不名未
來不名現在如受想行識不繫欲界不繫色界不繫無色
界不繫法者不名過去未來現在十二入十八界亦如是
如般若波羅蜜不繫欲界不繫色界不繫無色界不繫法
者不名過去未來現在禪那波羅蜜乃至檀那波羅蜜亦
如是內空乃至無法有法空亦如是如四念處不繫欲界
不繫色界不繫無色界不繫法者不名過去未來現在乃
至八聖道分亦是佛十力乃至十八不共法亦是如
如法性法相法住法位實際不可思議性戒定慧解脫

解脫知見眾一切種智無錯謬法常捨行不繫欲界不繫色界不繫無色界不繫法者不名過去未來現在是回向所迴向處行者不繫皆亦如是是諸佛亦不繫諸善根亦不繫是諸聲聞辟支佛善根亦不繫不繫法者不名過去未來現在若菩薩摩訶薩行般若波羅蜜時如是知色不繫三界不繫法者不名過去未來現在若法不名過去未來現在法者不可以取相有所得法回向阿耨多羅三藐三菩提何以故是色無生若法無生則無法無法中不可回向受想行識亦如是檀那波羅蜜乃至般若波羅蜜四念處乃至無錯謬法常捨行不繫三界不繫法者亦非過去未來現在若非過去未來現在者不可以取相有所得

法回向阿耨多羅三藐三菩提何以故是法無生若無生則無法無法中不可回向菩薩摩訶薩如是回向則無裸毒若求佛道善男子善女人以取相得法以諸善根回向阿耨多羅三藐三菩提是名邪回向若邪回向諸佛所不稱譽用是邪回向不能具足檀那波羅蜜乃至般若波羅蜜不能具足四念處乃至八聖道分內空乃至無法有法空佛十力乃至無錯謬法常捨行不能具足淨佛國土成就眾生若不能淨佛國土成就眾生則不能得阿耨多羅三藐三菩提何以故是回向裸毒故復次菩薩摩訶薩行般若波羅蜜時應作是念如諸佛所知諸善根回向是真回向我亦應以是法相回向是名正回向爾時佛讚須菩

提善哉善哉如汝所為為作佛事為諸菩薩摩訶薩說所
應回向法以無相無得無出無垢無淨無法性自相空常
自性空如法性如實際故須菩提若三千大千國土中眾
生皆行十善道四禪四無量心四無色定五神通於須菩
提意云何是眾生得福多不甚多世尊佛言不如是善男
子善女人於諸善根心不著回向阿耨多羅三藐三菩提
須菩提是善男子善女人福德最上第一最妙無上無與
等復次須菩提若三千大千國土中眾生皆得須陀洹乃
至阿羅漢辟支佛若有善男子善女人盡形壽供養恭敬
尊重讚歎衣服飲食臥具醫藥供給所須於須菩提意云
何是善男子善女人是因緣故得福德多不甚多世尊佛

491

言不如是善男子善女人於諸善根心不著回向阿耨多
羅三藐三菩提最上第一最妙無上無與等

摩訶般若波羅蜜經卷第十二終

492